



Maletg directiv

Uniun svizra da musica USM

Fundada ils 30 da november 1862 ad Olten

L'Uniun svizra da musica (USM) tracta equalmain dunnas ed umens. En il sequent vegn duvrada la furma masculina per omaduas schlattainas sulettamain per motivs d'ina simplificaziun linguistica.



Maletg directiv

Preambel

Il maletg directiv da l'Uniun svizra da musica duai gidar nus a diriger nossas activitads. Nus examinain regularmain l'effizienz da nossa lavur e da noss maletg directiv.

Nus essan in'uniun dinamica e conscienta da sasezza. Nus utilisain nossa libertad d'agir autonoma en tut ils champs a favur dals musicants.

L'Uniun svizra da musica surpiglia la rolla directiva sco organisaziun tetgala per tut ils musicants da las societads da musica en Svizra. En quest senn è la direcziun da l'uniun pronta da s'occupar d'ulteriuras incumbensas da la Confederaziun u dad organisaziuns internaziunalas.

L'USM procura per cundiziuns da basa optimalas, per che tut ils musicants hajan las meglras premissas per exequir lur activitads musicalas.

Nus ans engaschain per ina collavuraziun collegiala tranter las uniuns e las societads. Per incumbensas e projects pli gronds tschertgain nus primarmain soluziuns che resguardan interess superiurs.

L'Uniun svizra da musica intensivescha la collavuraziun cun tut las uniuns. Ella è persvadida ch'igl ha avantatgs finansials e logistics da schliar cuminaivlamain incumbensas pli grondas.

Nus tgrain il dialog cun las uniuns e purschain plattafurmas che gidan a stabilir contacts. Nus essan averts per las ideas ed ils basegns dals musicants ed integrain tut las personas pertutgadas ed interessadas, cura ch'i va per schliar problems e vegnir ad ina decisiun. Nus utilisain tut las medias per infurmar ils musicants a temp ed a moda chapaivla e cumplexsiva davart quai che capita en l'Uniun svizra da musica.

L'Uniun svizra da musica è attractiva, sche sias uniuns sa participeschan activamain als process da decisiun e gidan a concepir lur ambient. In dals giavischs central da l'USM è perquai d'optimar l'infurmaziun e la communicaziun cun las uniuns e da promover ils process da decisiun democratica. En l'avegnir vegn ella a communitgar pli e pli sur l'Internet. Per quest motiv duai la pagina Web da l'USM d'avegnir in secretariat virtual.

Per intermediar las enconuschienschas necessarias dal passà a las generaziuns vegnintas cumplettescha l'USM cuntinuadamain l'archiv cun fotografias e documents en scrit.

Nus essan in'uniun effizienta cun ina buna organisaziun. En il center stat il servetsch per ils musicants. Ultra da quai essan nus il post d'infurmaziun e da documentaziun central da la musica svizra.

Il secretariat da l'Uniun svizra da musica ademplescha sias incumbensas sco center d'infurmaziun e da servetsch modern e cumplexsiv.

Nus sustegnain ils amatur da musica da tut las vegliadetgnas tenor lur talent e lur preferenza musicala.

L'Uniun svizra da musica promova la furmaziun da ses musicants e dirigents cun curs da perfecziunament che gidan ad augmentar la qualitat da la musica instrumentala.

Nus ans engaschain activamain per ils giuvenils e manain cun els in dialog ch'è caracterisà da toleranza e chapientscha. Nus creain, sustegnain e promovain structures che servan al saun svilup, a l'integraziun en la societad ed a l'intermediaziun da la solidaritad e responsabladad sociala.

L'Uniun svizra da musica fa tut ses pussaivel, per che la musica instrumentala saja attractiva era per ils giuvenils. Perquai s'engascha ella ils proxims onns en spezial per la giuventetgna. Uschia tschertga ella regularmain il contact cun ils giuvenils per vegnir a savair ils basegns e las opiniuns dals musicants giuvens.

Nus sustegnain e promovain purschidas che contribueschan a la furmaziun ed a l'organisaziun raschunaivla dal temp liber.

L'Uniun svizra da musica collavura cun la Confederaziun ed ils chantuns e sustegna lur stentas per ina purschida da furmaziun d'alta qualitat a las scolas da musica ed als conservatoris.

Nus promovain la musica instrumentala en tut sia varietad.

L'Uniun svizra da musica sustegna cun dar incumbensas da cumposiziun ina litteratura originala e fitg qualitativa per musica instrumentala. L'USM sustegna l'organisaziun dad occurrenzas e la participaziun a concurrenzas naziunalas ed internaziunalas.

Nus agin en tut ils champs tenor ils princips da la persistenza.

Era las generaziuns futuras duain pudair viver en in ambient intact. L'Uniun svizra da musica s'engascha a favur d'ina pratica responsabla da la musica instrumentala. Tut las ideas e tut ils projects duain vegnir realisads tenor il princip da la persistenza ed examinads cuntinuadamain.

Nus tgirain il contact cun l'economia e cun la Confederaziun per pussibilitar a l'uniun ina situaziun finanziaria solida.

L'Uniun svizra da musica tgira contacts intensivs cun l'economia e cun la Confederaziun. En spezial duai vegnir rinforzada la tschertga da novs sponsurs.